

# Pronađeno oko 7 kilograma opojne droge “Marihuana”

12.01.2012 12:16



Službenici Odjeljenja za borbu protiv zloupotrebe opojnih droga MUP TK-a su tokom mjeseca decembra prošle godine i januara 2012.godine, poduzeli niz operativno-taktičkih mjera i aktivnosti na sprečavanju zloupotrebe opojnih droga na području općine Tuzla, na osnovu kojih su došli do saznanja o određenim licima, za koje postoje osnove sumnje da se mogu dovesti u vezu sa krivičnim djelom “Neovlaštena proizvodnja i stavljanje u promet opojne droge”.

Shodno tome, službenici navedenog Odjeljenja su u navedenom periodu izvršili pretres ukupno sedam lica, te pretres jednog stambenog objekta na području općine Tuzla koje koristi I.H., rođen 1987.godine iz Tuzle. Prilikom navedenih pretresa je kod 4 lica (I.N., rođena 1990.godine iz Brčkog, A.K., rođen 1991.godine iz Tuzle, A.F., rođen 1992.godine iz Tuzle i Z.A., rođen 1991.godine), te u stanu koji koristi I.H., pronađena određena količina materije koja svojim izgledom asocira na opojnu drogu “Marihuana”. Pronađena materija (kod navedenih lica i u stambenom objektu) je ukupne količine od oko 32 grama, a za istu je vještačenjem u kriminalističkoj tehnici MUP TK-a utvrđeno da se radi o “Marihuani”.

Kantonalnom Tužilaštvu Tuzla podnesena su 4 izvještaja o učinjenom krivičnom djelu, i to dva za KD “Neovlaštena proizvodnja i stavljanje u promet opojne droge” protiv I.H., A.F. i E.DŽ, rođen 1993.godine iz Olova, te dva izvještaja za krivično djelo “Posjedovanje i omogućavanje uživanja opojnih droga” protiv I.N. rođena 1990.godine iz Brčkog i A.K., rođen 1991.godine iz Tuzle.

Takođe, tokom operativnog rada službenici Odjeljenja za borbu protiv zloupotrebe opojnih droga MUP TK-a i Odjeljenja za krim. obavještajne poslove MUP TK-a, došli su do saznanja da postoje osnove sumnje da se kod D.Lj., rođen 1979.godine iz Tuzle nalazi određena količina opojne droge, nakon čega je dana 10.01.2012.godine izvršen pretres kuće koju koristi D.Lj. kojom prilikom nije pronađena opojna droga, dok je u pomoćnom objektu pored navedene kuće (za kojeg se pretpostavlja da ga koristi D.Lj.) pronađeno 8 (osam) pakovanja biljne materije, koja svojim izgledom asocira na opojnu drogu “Marihuana”. Pronađena materija je izuzeta i dostavljena krim. tehnici MUP TK-a, gdje je vještačenjem utvrđeno da se radi o “Marihuani”, ukupne količine oko 7 (sedam) kilograma.

O navedenom je obaviješteno Kantonalno tužilaštvo Tuzla, a službenici policije MUP TK-a nastavljaju rad na dokumentovanju i rasvjetljavanju ovih događaja, te na suzbijanju i sprečavanju zloupotrebe i stavljanja u promet opojnih droga.